

# **Poloni Efesus Imboma Pipia Topa Tirimu Ungumu Efesus I Ungu Torumumunga Ungu Pulu Mare**

Jisas ulu tukume terimumu lopeke tepa lerimu ungu mare Poloni nimbe para tipelie i ungu topa panjirimu. Lino meme tendekumu nimbe Poloni lino nendo yando konopu mondopo kandiki tepo konopu tendekuna pupili molamili nimbe ungu mane tirimu. Jisas ipuki tirimele imboma nombeya teko molko teangei mele kape ungu mane mare tirimu.

Goteni nu yunge imboma kinye nombeya tenio wali nuni eno konopu mondoko kandiki teko eno kinye konopu tendekuna pupili molani nipili!

*Kraistini linonga nimbe tenderimumunga  
Goteni lino imbo koinjoma molangei nimuna  
moromolo ungumu*

<sup>1</sup> Na Pol, Jisasi Kraistini yunge kongono tendonewi nimbe lipe mundurumo iyemu. Goteni na aku teko molowi nimuna aku tepo moro. Pipia topo tiromu eno Gotenga imbo ulke kombu Efesus moromele imbo Jisasi Kraist paa enge ninga ambolko pilko i pipiamu topo tiro.

<sup>2</sup> Linonga Ara Gote kinye Awili Jisasi Kraist taloni eno kinye konopu noiko konopu u nipili molangei nengili nio.

*Kraistini linonga nimbe tenderimumunga  
Goteni mulu kombuna lino mele pengama tirimo  
ungumu*

**3-4** Goteni mulu mai talo oi naa tepili Kraistini pele linonga nimbe tendembalo mele pilipelie lino imbo kake teli imbo mongo tembalo ulu te naa peli imboma molangei nimbe kanopa ltimu kani Gote linonga Awili Jisasi Kraistinga Lapamu kapi nimbo imbi lipo ola mundemili. Kraistini linonga nimbe tenderimu lino kinye kopu tepe moromomunga Goteni lino mane ungu tipe mulu kombuna yando linonga konopuma kinye minima kinye enge nimbe manda pepili nimbe ulu pengama tipe mundurumu. Lino konopu mon-dopalie

**5** paa koro oi lino kanopa lipe Jisasi lino lipe tapondombalomunga eno nanga imboma tepo limbo nimu. Yuni lino konopu noipelie yunge konopuni aku ulu terimu.

**6** Yunge marenu konopu mondoli lino tapopili nimbe we tipe mundupe terimu ulu konopu lipo manjipolio wali yu kapi nimbo yunge imbi paka tondamili.

**7** Goteni imboma we kondo kolopalie Jisasi linonga nimbe kolopili nimbe aku tepalie yunge mememuni linonga ulu alowa tendelimanga tiye kolopalie lino wendo ltimu.

**8** Yu lino paa kondo kolorumu. Aku tepalie lipe manjili uluma kinye moke teli ulu pulumu kinye awini toya topa tirimu.

**9** Aku tepe tipelie Kraistini linonga nimbe tendembalomunga Goteni lino kinye konopu tipe tembalo mele nimbe panjirimumu lopeke tepe

perimu nalo kinye lino lipe ondorumu.

**10** Lopeke tepa perimu ulumu manda tembalo waina wendo opili nimbe panjirimu. Aku wali oi tepa mulu mai talo melema kinye yandopa melema pali aku melema pali nokopalie iye tengal topa lipe popo tipe liepili Kraist kano melemanga pali nokoli iyemu molopili nimbelo.

**11** Yunge konopuni pilipe melema kinye uluma pali kanopa lipe nanga kongono tendangei nimbe oi nimbe panjirimu. Aku tepa Goteni lino Juda imboma kano iye Kraistini linonga nimbe tendembalo mele pilipelie mulu mai talo oi naa tepili nanga imboma molangei nimbe kanopa ltimu.

**12** Lino Juda imboma oi pulu polopo Kraist ipuki tipo lombilerimulu. Goteni lino imbi topa ltimumunga imbo palini aku ulu enge nilimu kanokolio yu kapi nengei.

**13** Eno imbo talape lupema kape Gotenga ungu tukumemu pilko ltingina Goteni tukundo ltimu. Kraist ipuki tiko kopu teko moloringi wali Goteni yunge imboma nimbe Mini Kakemu tirimu.

**14** Mini Kake Teli ltimulu akumunga Goteni lino pele molonge mele timbo nimbe panjirimu mele pengama yunge imboma paimbo timbelo lipo manjirimolo. Pele paimbo timbelo limolo nimbo pilipolio Goteni lino yunge imboma kamukumu limbelo kinye Satanenga ulu keri teni lino altopa manda naa ambolombalo nimbo pimolo. Linonga nimbe aku tendembalo kinye kanopolio lino yu kapi nemili nimbe tendembalo kani yunge imbi mu paimbo lipo ola mundundupo yu kapi nemili.

*Poloni Efesus imbomanga Gotendo paa tereno nimbe eno Gote liko manjengei nimbe konge tenderimu ungumu*

**15** Goteni eno taporomomunga eno Awili Jisasi paa ipuki tiko Gotenga imboma pali konopu mondormele mele oi pulu polopo pilendu. Kinye kape

**16** eno aku teremelemunga Gotendo waliwali ma paa tereno nimbo nani Gote kinye enonga konge tendero.

**17** Awili Jisasi Kraistinga Lapa Gote Enge Nilimuni yunge Mini Kake Telimu tipe yunge imboma lipe manjili ulumu tipili nimbe, yunge lopeke teli uluma pilengei nipili nimbe nimona eno yu paa kanoko ltendangei nimbo konge tero.

**18-19** Enonga konopuni yunge ungumanga pulumu paa pilengei nimbo yu kinye enonga konge nindirola. Yuni eno mele pengama timbo eno molko kondonge nimbe, nimbe panjirimu melema nokoko moromele akuma kinye nanga imboma molonge mele paa pengama timbo nimuma kinye yu paimbo nimbo enge nimbo pimolo imboma yuni lipe tapondoromo enge paa olandopa olandopa peremomu kinye mona lepili paa pilengei nimbo aku tepo yu kinye enonga konge nindirola. Kano enge olandopa peremomu lino te aku tepea oi naa kanoli. Engemupe i tepe mele. Enge nimbe terimuna

**20** Kraist oi kolorumu wali Goteni yu topa mak-injipelie mulu kombu mepa pumbe yunge imbo kindo mondorumu enge akumuni lino kinye terimu.

**21** Aku ulu teremomunga kuro enge nilima akuma maindo mundupe iye kamakoma gavman imboma waye enge kinye itemoma altopa ombaloma kape peya maindo mundupe yu paa olando moromo.

**22** Goteni melema pali Kraistingu kimbona maindo lepili nimu. Aku ulu terimumunga Kraist yunge imbomanga yu iye kamako kiyendomu moromola. Yu kangimunga pinyewemu.

**23** Kraistingu imbo talapemu yunge kangimu. Kraist kinye yunge imbo talapemu kinye eno lipa popo tipe imbo tendeku mele. Yu yunge imbo talape moromelemanga pali yu pumbe molopa manda tenderemo. Yu melemanga pali molopa manda tenderemo.

## 2

*Lino imbo kololima Goteni Kraist kinye peya koinjo molangei nimu*

**1** Enonga teko kenjiringi uluma kinye ulu pulu keri teringima kinye akumani eno toko kondoringi.

**2** Aku teko moloringi wali ya mai kombumanga ulu pulu kerima kau teko, kuroma nokoromo iyemu kau lombili pungo pilko moloringi. Kinye imbo mare Gotenga ungumu liko tui tiko naa pimele imboma kano kuromanga iye nomimuni enge nimbe nokopa enonga konopuna moromo.

**3** Kano imboma kinye moromele mele oi lino imboma pali tendekuna molopo, oi konopu keri pelimani eio nimbo ulu pulu kerima kau pilipo tepo, kano konopumani kinye kangimani kinye konopu mondoko teamili ningi mele kau pilipo

lombili pumbo tepo molorumulu. Oi we imboma kinye aku tepo molorumulu mele we molemalanje Goteni we imboma mindili tipo pundu tombo nimu mele linondo peya nilka.

**4-5** Paimbo lino tepo kenjirimulumunga imbo kololima molorumulu nalo Goteni lino Kraist kinye peya altoko koinjo molangei nimu. Tepo kenjirimulumunga Goteni pundu taio nilka nalo paa we kondo kololi ulumu peremo Goteni lino paa konopu mondopalie lino Kraist kinye peya altoko koinjo molangei nimu. Gotenga we kondo kololi ulumuni kau lino lipe tapondopa mindili nomolo aulkena wendo lipe yu kinye peya koinjo molopo kau pumolo ulu pulumu tirimo.

**6** Goteni lino Kraist kinye popo tipe topa mak-injirimu. Aku tepalie lino Kraist kinye kopu tepa mulu kombuna yu molopa melema nokoromo polona Kraist kinye peya molangei nimbe lipe mondorumu.

**7** Akilio kape imbo molongeima na Gote imboma na kinye paa olandopa olandopa we kondo kololi ulumu peremo mele pilengei lipo ondambo nimbe Goteni lino aku tepa Kraist Jisasini linonga nimbe tenderimumunga kondo kolopa tepa kondorumu.

**8** Kraist enonga nimbe tenderimu mele paimbo ning enge ning pileringimunga Gotenga we kondo kololimuni eno mindili nolemala aulkena wendo ltindipe yu kinye peya molko kondangei aulkena lipe mondorumu. Aku ulumu enoni enongan naa teringi, Goteni eno we tirimu.

**9** Aku ulumu enoni kongono teringimunga pundu toko naa ltngi. Akumunga neya

aku ulumu limo imbo teni nanga kongono tendumunga neya aku ulumu ltiu nimbe yunge imbi yunu kapi naa nimbelo.

**10** Goteni lino Jisasi Kraist linonga nimbe tenderimumunga tepea koinjo mondorumuna oi lino andamili nimbe tumbi tipe noindirimu aulke koinjo pengana linoni andamili.

*Juda imboma kinye imbo lupema kinye pali  
Gotenga imbo talape tendekumu molangei nimbe  
Kraistini lipe tendeku tirimu ungumu*

**11** Goteni eno we taporumumunga Efesus imboma eno altoko ulu te konopuni pilengel! Eno Juda imbomani naa meringi. Juda imboma naa moloringimunga imbi leko kangi pundu kopili imboma nimele imbomani enondo kangi pundu naa kopili imboma ningi. Aku ulumu iyemani eno enongan kangikondo teringi ulumu kau. Akumu kinye altoko liko manjenge!

**12** Oi aku teko moloringi walimanga eno Kraist kinye peya tendekuna naa molko yu mele mele moloringi mele kinye altoko pileio. Aku walimanga eno Israel imbo talapena tukundo onge aulke te naa lerimu, Goteni yunge imboma kinye tembo nimbe, nimbe panjipe mi lerimu ungu akumu eno kinye naa perimula. Enonga ulu penga te pele wendo ombalo ningi konopu tiko nokoko molonge ulu pulu te naa pepa, ya mai kombuna Gotenga imbi pilko yu kinye tapu toko molonge aulke te naa lerimu mele kinye pileio.

**13** Nalo kinye eno oi wali te Gote kinye tule teko moloringi imboma Kraist yunge meme ondorumumuni Kraist Jisasi yuni eno kinye tapu topa

molopa eno Gote kinye nondoko molangei nimbe lipe popo tirimu. Kinye Yu kinye tendekuna moromele.

<sup>14</sup> Kraist yuni Juda imboma kinye eno we imbo lupema kinye opa pule toko molorumulu ulu pulumu topa manye mundupe yunge kangimuni andi yando konopu keri panjirimulu papemu alumbiye tepalie lino ame tondopa imbo talape talo popo tiko talape tendekumu molangei nimu.

<sup>15</sup> Moses ungu mane tirimuma kinye, aku ungu mane tipelie teaio nimu uluma kinye, ungu manemanga tukundo perimu unguma kinye, pali lino konopu keri perimuna imbo talape talo molorumulu. Akumunga Goteni Jisasinga kangimuni terimu ulumuni aku uluma pali kamukumu manye pupili altopa ulure naa tepili nimbeline kano papemu alumbiye terimu. Yuni molangei nimbe pilipe aku terimu mele i tepe, eno imbo talape talo nanga imbo talape tendekumu molangei nimbe lipe popo tirimula. Aku teko moltolio eno konopu tendekuna pupili molko kondangei nimbeline aku tepe terimu.

<sup>16</sup> Yu unjo polopeyana kolorumumuni kano imbo talape talo oi opa pule moloringima kamukumu kangi tendekumu molko Gotenga imboma molangei nimbe lipe popo tirimu. Yu unjo polopeyana kolorumumuni oi opa pule moloringi ulumu topa manye mundurumu.

<sup>17</sup> Eno Juda imbo naa molko Gote kinye tule teko moloringi imboma kinye, Juda imbo Gote kinye nondoko moloringi imboma kinye Kraist omba eno pali temane penga te topa tipelie nimbeindo, eno konopu tendekuna pupili popo tiko molaio

nimu.

<sup>18</sup> Yuni imbomanga nimbe tenderimumuni lino Juda imboma kinye we imbo lupema kinye pali Mini tendekumuni lipe tapondopa aulke akirindirimomunga Ara moromona nondopo manda pumolo aulke itemo.

*Lino Kraustinga imboma Gotenga ulkemu moromolo ungumu*

<sup>19</sup> Aku tenderimuna aku tepo moromolo aku-munga kinye eno imbo mare mai naa lepa imbo ombo angileli imboma mele naa moromele. Eno Gotenga Juda imboma kinye talape tendekumu molko, Gotenga imbo talape paimbomu molko,

<sup>20</sup> Gote moromo ulkemu mele moromele. Gotenga nimbe munduli unguma ninga para tiringi profet iyema kinye, Jisasini nanga kongonomu tendepaio nimbe lipe mundurumu iyema kinye, aku iyema kano ulkemunga pongama. Kraist Jisasi yu aku ulkemunga timumu.

<sup>21</sup> Ulke timumuni pele kokeyama ingi tipe amboromo kinye ulkemu enge nimbe angimo. Goteni ulkemu pele kokeya tepa moromo. Aku ulkemu kamukumu takombalo wali Awilimu yunge ulke kake telimu angilimbelo.

<sup>22</sup> Eno Kraistini tenderimumunga yu kinye tapu toko moromele imboma kape Goteni lipe popo tipe Gote yunge ulkemu takoromo, aku ulkena yunge Mini Kakemu kinye Gote moromo.

### 3

*Pol imbo talape lupemanga ungu nimbe tili iyemu molorumu ungumu*

<sup>1</sup> Kraistini imbo lupema kinye Juda imboma kinye peya Gotenga imboma molangei nimbe aku tepa imbo talape talo lipe tendeku tirimu akumunga na Pol Gote kinye ungu nimbo enonga konge tendero. Eno we imbo lupema lipo tapondoromunga na ka ulkena pero iyemu molopolio, enonga konge tendero.

<sup>2</sup> Ungu te oi pilerimu nemboi, Goteni na kinye eno kinye terimu mele pileringi konopu lteo. Akumu i tepa Goteni eno we kondo kolorumumunga lipe tapondombalo mele kamukumu pilengei nimbe na kanopa ltimu.

<sup>3</sup> Akumu Goteni ulu tembalo mele oi lopeke terimu akumu na nimbe para tirimu, akumu oi alaye kolte pipia topo nimbo tindu kanomu.

<sup>4</sup> I pipia toro akumu kanokolio pilenge kinye Goteni tembalo mele lopeke tepa perimumu Kraistini terimumunga mona lerimuna lipo manjiro mele eno pilenge.

<sup>5</sup> Ulu tembalo lopeke tepa perimu kanoma oi mololiko oringi imboma kinye nimbe para naa tirimu. Imbo mare, kinye nimbe para tirimu. Kinye kau Jisasini nanga kongonomu tendepaio nimbe lipe mundurumu iyema kinye, Goteni yunge nimbe munduli unguma ningotirimele imboma kinye, yunge imbo kake teli aku imboma kau Gotenga Mini Kake Telimuni nimbe para tirimo.

<sup>6</sup> Kano oi lopeke terimu kinye para lemo ulumu i tepa, Kraist Jisasini imbomanga nimbe tenderimumuni temane pengamu peremo akumuni we imbo lupema kinye lino Juda imboma kinye lipe popo tipe kangi tendekumu molangei nimbe,

Goteni imboma kinye tembo nimbe panjirimu mele Juda imboma kinye we imboma kinye pali teremo.

<sup>7</sup> Goteni we kondo kolopa na ungu tukumemu andopo topo tiembo nimbe kanopa lipe, aku kon-gonomu teambo nimbe na enge tirimu.

<sup>8</sup> Gotenga imbo moromelemanga pali na paa mainyendopa moro, nalo Goteni na we kondo kolopalie kongono i tepa tirimu, Juda imbo naa moromele imboma ungu tukumemu ningko tilko andowi nimu. Aku ungu tukumemu Kraistini lino kinye ulu penga terimuma, linoni manda naa moke tepo pilipo kambu manda naa toromolo uluma.

<sup>9</sup> Melema pali terimu Goteni pele tembo nimbe konopuna panjirimu mele koro oi yunu pilipe yu kinye lopeke tepa perimu mele altoko imbo naa pileringi kanoma, kinye nando imboma pilengei ningko tipuwi nimu.

<sup>10</sup> Oi lopeke tepa perimu nalo kinye Jisasi yu ipuki tiko moromele imboma kinye ulu pengama tepa mona ltenderemo muluna enselema kinye kupena kuro kerima kinye kanoko liko manjengei nimbe nimo.

<sup>11</sup> Paa oi Goteni aku ulu tembo konopu lerimu akumu kinye linonga Awili Jisasi Kraist kinye aku ulu terimu.

<sup>12</sup> Kraist ipuki tipo yunge imboma moromolomuni pipili naa kolopo Gotenga kumbekerena tumbi tipo purumolo.

<sup>13</sup> Akumunga nani eno konge tepolio nimboindo, na eno lipo tapondomboindo mindili nomboi moro mele konopu awini naa liko

mundukolio paimbo ninggo enge ninggo pilko moromele mele tamba naa nipili. Na mindili noro ulumuni Gote kinye peya tapu toko moromele mele lipe tapondoromomunga konopu tiko molaio.

*Poloni Gote kinye Efesus imboma enge ninggo molangei nimbe konge terimu*

<sup>14</sup> Oi nimbo tendu kanomu, kinye ya kamukumu nio. Goteni Juda imbo talapemu kape we imbo lupema kape lino pali tembo nimbe panjirimu mele kinye teremo ulumu pilipolio akumunga na linonga Lapa kinye ungu nimbo enonga konge tendambo nimbo yunge kumbekerena komongo topo pondoro.

<sup>15</sup> Gotenga imbo talape akumu mulu kombuna tukundo moromelema kinye, ya mai kombuna moromoloma kinye, pali imbo talape tendekumu nimbe yuni enonga imbi tirimu.

<sup>16-17</sup> Nani Ara kinye ungu nembo nimbo yu moromona komongo topo pondopolio konge tepolio nimboi. Iye Kamako Gote, nu ipuki tiko moromele imbomanga Kraist enonga konopumanga yunge ulkemu nimbe kamukumu molopili ninggo nunge enge pengama liko Mini Kake Teli imboma tukundo tipili ninggo tiwi. Unjo te enge nimbe angilimbeindo yunge pulkono maina mainye purumo mele eno aku teko konopu mondoli ulu pulumunga tukundo molko enge nipili molangei niwi.

<sup>18</sup> Aku tekolio Kraistini lino pali konopu mondoromo mele paa manda leko pilko kondonge engemu Gotenga imboma pali kinye nunge imboma kinye peya pepili ninggo Kraistini lino pali konopu

mon doromo ulu akumu paa tule tepa pumbe paa palaku lepa pumbe paa olando tipe pumbe paa maindo purumo mele pilinge engemu nunge im-boma tiwi.

<sup>19</sup> Gote nunge ulu pulu penga noiko tirinoma enonga konopumanga aku uluma pali tengepeya tepa pepili ningko kano Kraistini konopu mon-doromo ulu pulumu enoni pilengei ningko enge tiwio nimbo enonga konge tendero. Aku Krais-tini konopu mon doromo ulumu we konopuni kau manda moke teko pimolo aulke te naa ltemo.

<sup>20-21</sup> Akumunga Gotenga imbimu paa olan-dopa molopa kau pupili nemili Gote yunge en-gemuni linonga konopumanga kongono teremo-munga linoni konge temolo uluma kinye team-boi molo aku tepo molambo molo aku tepo ulu lupe lupe konopuni pimolo mele uluma pali yuni yunge engemuni paa olandopa manda tembalo iyemu moromo, akumunga Kraistinga imbo ta-lapena tukundo molopo Kraist Jisasi peya lino tapu topo moromolo imbomani kano kongono ter-emo Gotenga imbimu akilio kape paa kamukumu paa olandopa molopa pupili nimbo yu kapi nimbo imbi lipo ola mundemili. I paa.

## 4

*Poloni lino Kraistinga imboma yunge kangimu molopolio Goteni teaio nimo unguma kau pilipo lipo teamili nimu ungumu*

<sup>1</sup> Akumunga na Awilimunga kongono teru-munga ka ulkena pepo moro iyemu, nani enge nimbo eno ungu mane tipolio nimboindo Goteni enondo eno nanga imboma molko nanga kongono

tendangi wangei nimbe kanopa ltimuna ongo  
yu kinye moromele imboma mele moltolio yuni  
kanopa penga pimo uluma teko molaio.

<sup>2</sup> Waliwalima nanga imbi ola naa molopili, im-  
boma kinye peya taka lipo molambo ningi mo-  
laio. Imbomani eno teko kenjinge wali anjo enoni  
konopu mondoko pundu naa toko we tiye kolko  
konopu awini liko naa mundeio.

<sup>3</sup> Lino Kraistingu imbo talape tendekumu moro-  
molo imboma konopu tendekuna pupili taka lipo  
molamili ningi konopu tendekuna pupili nimo  
Minimuni eno nombeya tepa ka topa ambolopili  
ningi molaio.

<sup>4</sup> Lino Kraistingu imboma, lino kangi  
tendekumu. Mini Kake Teli linonga  
konopumanga moromomu yu tendekumu kau.  
Aku tepala Goteni linondo yunge imboma  
molangei waio nimu mele kombu pengana  
pumbo molomolo nimbo konopu tipo nokopo  
moromolo ulu tendekumula.

<sup>5</sup> Linonga Awilimu tendekumula. Ipuki tili  
ulumu tendekumula. No lili ulu pulumu tendeku-  
mula.

<sup>6</sup> Linonga pali Lapa Gote tendekumu kau. Yu  
lino Kraistingu imbomanga pali olando moromo.  
Yu linonga pali tukundo kongono tepa moromo.  
Yu linonga pali konopumanga moromo.

<sup>7</sup> Gote we kondo kolorumumunga Kraistini lino  
tepo kondoromolo engema moke tepa lino te te  
nimbe awini we tirimu.

<sup>8</sup> Gotenga Bukumunga i tepa nimbe peremo:  
Yu paa muluna olando pumbe ka ulke peli imbo  
awinima mepa pumbelie yunge imboma

melema we tirimu.

(*Sng 68:18*)

**9** Kraist yu olando purumu nimu akumu olando kau purumumunga lipe ondorumuya? Molo. Oi yu paa maina manyendo purumumunga lipe ondorumu.

**10** Iye muluna paa olandopa purumu iye kanomu oi maina manyendo purumu iyemu. Mulu mai talonga pali undukana molombai aku terimu.

**11** Kano iyemuni kau maina imboma engema moke tepe we tirimu. Imbo mare yunge kongonomu tendangei nimbe lipe mundumbeindo eno aku kongonomu teangei engemu tipe, mare kanopa lipe yunge nimbe munduli unguma imbo-mando ninggo tenggei engemu tipe, mare kanopa lipe Gotenga ungu pengamu nilko tilko andangei engemu tipe, mare kanopa lipe Kraistingu imbo talapemanga tapu iye kongono teangei enge tipe mare kanopa lipe Goteni kanopa penga pilimbelo mele mane tinge enge tipe aku teangei engemu tirimu.

**12** Kraistini nanga kangimu enge nimbe molopa kondopili nimbe Gotenga imboma pali Kraistingu kendemande kongonomu teko molangei nimbe aku tepe engema yunge imboma moke tepe we tirimu.

**13** Lino yunge imboma paimbo nimbo enge nimbo pilimolomunga konopu tendekuna pupili molopo, Gotenga Maloni konopuni pilipe moromo mele lino pali tendeku tipo pilipo kondopo, imbo yu konopu pepili mololipo pumbo, kamukumu Kraist moromo mele lino imbo konopu pepili molamili nimbe aku terimu.

**14** Aku tepo tepo molomolo kinye bakulu

keloma konopu naa peli moromele mele naa molomolo. Nomuna poporome topa sip mare we topa mepa andoromo mele iye mare kondi toko kolo toromele iyema ongo eno i teko teaio i teko teaio ninga mane tirimele kinye we pilko konopuma alowa malowa teko lombili purumele mele lino aku tepo naa temolo.

<sup>15</sup> Kolo toli iyemani ninge mele komu tendepo naa pilipolio Kraistinga kangimu moromolo imbomani lino nokopo linonga pinyewe moromo iye Kraist moromo mele molamili nimbo nendo yando konopu mondopo ungu paimboma kau nimbo molamili.

<sup>16</sup> Yu kimbo ki kangi melemanga pali nokoromo iye pinyewemu. Yuni ombele pulkono melema pali enge nipili nimbe enge tirimo. Akumunga kangimunga melema pali nendo yando konopu mondopa lipe tapondoromomuni kangimu akopa awili lepa enge nimbelo.

*Kraistinga imboma oi uluma tiye kolko ulu pulu koinjoma teko molonge ungumu*

<sup>17</sup> Jisasinga kongono iye molopo yunge imbi lipo eno kane kane molaio ungumu nimbo timboi. Eno imbo imbomanga tengen ulu naa teaio. Enonga konopu mepa andoromo.

<sup>18</sup> Kano imboma eno uluma pali naa pilko enonga konopuma pipi tirimelemunga Gote molopa teremo mele naa pilko, enonga lipe manjilima tumbulu toromo akumunga eno Gotenga koinjo molopa kondolimunga tawendo moromele.

<sup>19</sup> Ulu teremelema pilko moke teko pipili kolonge ulu pulumu mainye purumu eno kinye naa

peremomunga eno ulu kerimanga tukundo tumbi tiko pungo, imboma kanokolio mai koromele ulu kalaro mololima konopu kimbo tiko teko moromele.

**20-21** Pileio! Lino oi Kraistingu ltemo ungu tukumemu nimbo tirimuluma paa pileringi konopu lteo. Aku wali eno imbo imbomanga ulu pulu kerima teaio ungu naa nimbo tirulu.

**22** Eno tenge mele ninga mane tirimulu mele i tepe: Eno oi moloringi kinye enonga oi we konopuman ulu pulu kerima eio konopu leringi kano konopuma tiye kolangei. Aku teringi ulumani ya mai kombuna molko kenjiko kolkolio kombu kerina pungo mindili nongo molko kenjiko kau pulimala.

**23** Kano oi we konopuma tiye kolko eno konopu koinjoma pepili molangei.

**24** Gote konopu peremo mele lino yunge konopu koinjo teremomu aku tepe pepili ningolio Goteni ulu pulu penga tumbi nilima tepe paa kake tepili moromo mele aku teko molangei nimbo ungu mane aku tepo nimbo tirimulu.

**25** Akumunga oi we konopuma tiye kolko konopu koinjoma liko panjikolio eno ungu kolo toli ungumu tiye kolko, kangi tendekumunga kimbo ki melema angimo mele aku tepo lino Kraistingu imboma pali konopu tendekumu pepili moromolo kani Kristen imbomando ungu paimboma kau ninga molaio.

**26** Eno mumindili tembalo kinye ulu pulu keri te naa teamili. ninga, pilko kondoko molaio. Eno mumindili kolko molangei ena naa pepupili.

**27** Nalo aku mumindili we kolkolio eno Satan nambu toko linge kani.

**28** Melema wapu ltimele imboma aku ulumu tiye kolko kinye wapu naa liko, kongono teangei. Enonga kimani melema wapu naa liko imbo mare mele molo lembaloma lipo tapondopo melema tiemili ningolio kano wapu noli imbomani enonga kimani kongono pengama teangei.

**29** Enonga keremanga ungu keri te wendo naa opili neio. Kraistingu imbo konopu tamba nimbeloma kinye molko kenjingema kinye eno enge timbelo unguma kau neio. Unzu mare kano imboma pilenge wali eno lipe tapondombalo unguma kau neio.

**30** Mini Kake Telimuni eno imboma ulu pulu kerimani kondi toromo kombumunga pele kamukumu wendo pungo, ulu pulu keri te naa peremo kombuna wangei kani nokopa molopili nimbe Goteni Mini Kake Teli tirimu akumuni kanopa keri pilipe konopu naa mondombalo uluma naa teangei.

**31** Imbo lupema kinye konopu keri panjiko teko kenjiko, iri toko mumindili kolko, opa teko ungu umbulkondo nindiko, aku ulu teremelemanga ulu puluma tiye kolaio.

**32** Enoni enongan nendo yando kondo kolko teko kondoko, Kraistini enonga nimbe tenderimumunga Goteni enonga ulu pulu kerima we tiye kolopa enondo pundu taio naa nimu mele aku teko imbomani eno teko kenjinge uluma we tiye kolko pundu taio naa nengei.

*Gotenga pana molamili nimu ungumu*

<sup>1</sup> Aku tepa eno Goteni paa konopu mondoromo bakuluma yuni tepa moromo mele lombilko teko molaio.

<sup>2</sup> Eno enongano nendo yando konopu mondoko kau molangei. Kraistini lino konopu mondopalie linonga nimbe kolo wangopa kolondorumu aku teko imboma konopu mondoko molaio. Oi kongi kinye melema kalko Gote popo toko tiringi kinye munemu pilipe penga pilipe ltimu mele Kraistini lino konopu mondopa Gote popo topa yunge kangi toringimu tirimu akumu aku tepa pilipe ltimu.

<sup>3</sup> Eno Gotenga bakuluma moromele kani wapu ulu kerinali naa teko, imbo tengah kangina ulu kalaro mololi uluma naa teko, mele noirimele melema manda naa teremo ningi imbo marenga melema kumu meko nani lipo noiemboa ningi naa teaio. Aku ulumanga temane te kape paa naa taio. Gotenga imbo kake telima aku uluma tenge molo temane tonge kinye manda naa tembalo kani aku teko paa naa teaio.

<sup>4</sup> Imboma pilkolio pipili kolonge ungu kerima kape naa ningi, kauwe unguma pilko imboma owe teangei ningi temane kerima toko aku alowa teko unguma naa neio. Aku tepa ungu kerima lino Kraistinga imboma nimolo kinye manda naa tembalo. Aku unguma naa ningi, Goteni eno tepa kondoromomunga yu paa tereno ningi molaio. Aku tenge kinye penga.

<sup>5</sup> Eno paa i teko wamongo teko pilengei: Wapu ulu kerinali teko, imbo tengah kangina ulu kalaro mololi uluma teko, mele noirimele melema

manda naa teremo ningi imbo marenga melema kumu meko nani lipo noiemboa nimele imboma Gote kinye Kraist talo iye nomi king molko nokorombele kombuna pungo mele pengama linge aulke te paa naa itemo. Melema kumu meremele imbomani we melemando linonga Gote ningi popo toko kapi nimele imboma moromele.

<sup>6</sup> Imbo teni lino teko kenjirimele nimbe ungu pulu te naa peli we unguma kolo topa kondi tombalo ningi paa kanoko kondoko molaio. Aku teko teremele imboma Goteni nanga ungumu liko tui tiko da teko moromele nimbe eno kinye mu-mindili kolopa tepa tombalo kani eno liko man-jiko molaio.

<sup>7</sup> Aku ulu keri teremele imboma eno kinye kopu teko naa molaio.

<sup>8</sup> Oi eno tumbulu tolina moloringi nalo kinye Awilimuni eno pa telina mondoromo kani eno pana moromele imboma moromele mele aku teko molaio.

<sup>9</sup> Pa telimunga mongo toromo mele i tepa. Ulu pengama kinye ulu tumbi nilima kinye ungu paimboma kinye aku uluma wendo opili nimo.

<sup>10</sup> Awilimuni kanopa konopu tirimo uluma pilipo kondopo teamili ningi molaio.

<sup>11</sup> Tumbulu tolimunga ulu puluma paa naa teaio. Tumbulu tolimunga ulu puluma eno lipe tapondombalo enge te naa peremo. Tumbulu tolimunga ulu puluma naa teko, imbomando tumbulu tolimunga ulu puluma keri ningi, ningi tingi kinye paa.

<sup>12</sup> Gotenga ungumu liko tui tiko teremele im-

bomani lopeke teko konopu tiko teremele mele nimbo timboindo kape mai kolka.

**13-14** Nalo pamuni mele tepa mona ltendere-moma pali ulumanga puluma waye ltemo. Pa telimuni melte tepa mona ltenderemo kinye kano melema kape pa teremo akumunga melemanga puluma mona ltemo. Akumu pilko kunana tenga ungu te toringi akumu i tepa:

Imbo uru pelimu, nu makilkko molowi. Ono kom-buna makiliwi.

Aku tenio kinye Kraistini nu moloniona pa ten-dembalo.

**15** Akumunga eno teko molonge mele kanoko kondoko molaio! Eno imbo lipe manjili naa peli imboma mele naa andangei. Lipe manjili peli imboma andoko molaio.

**16** Kinye moromele walima imbomani teko kenjirimele kenjinge walima akumunga eno lipe manjili peli imboma andoko molkolio, ulu pengama tengen waima wendo wendo ombalo kinye welea welea tepo naa temolo kinye ulu mareni omba pipi timbelo kani welea welea tepo teamili ningko kano ulu pengama tumbi tiko teaio.

**17** Akumunga, ulu alowa teli uluma naa teaio. Awilimuni eno teaio nimo mele liko manjiko kondokolio aku teko teaio.

**18** No awini nongo keke lepo naa taio. Aku tengen wali eno enongano teko kenjimbelo uluma tengen kani aku ulu naa teaio. Gotenga Mini Kake Telimu enonga konopuna molopa manda tepili neio.

**19** Mini Kake Telimu enonga konopuna molopa tepili eno enongano nendo yando Gotenga imboma kinye ungu nemili ningolio Gotenga

Bukuna moromo kunanama kinye eno maku toko kunana nimele kunanama kinye Mini Kake Telimuni enonga konopuna tope timbelo pilenge kunanama kinye ningo Awilimu kapi nemili ningo kerena kape konopuna kape kunana ningo <sup>20</sup> linonga Awili Jisasi Kraistingu imbi leko waliwalima Lapa Gotendo melemanga pali paa tereno neio.

*Lino linonga imboma kinye ungu pilipo taka lipo molomolo mele ungu mare*

<sup>21</sup> Kraist yu linonga Iye Awilimu ningo yunge ungumu pilko molkolio andi yando Gotenga imbomanga maindo molaio.

<sup>22</sup> Eno ambomani Awilimu kinye maindo moromele mele enonga iyema kinye maindo molaio.

<sup>23</sup> Ambe temona Kraist yunge imbomanga pinyewemu moromo mele enonga iyema enonga pinyewe mele moromele. Kraistini yu ipuki tirimele imboma tepa ltimu aku imboma yunge kangimu.

<sup>24</sup> I tepa mele Kraist yunge imboma yu kinye maindo moromele mele eno amboma enonga iyemanga waliwalima maindo molaio.

<sup>25</sup> Eno iyema, Kraistini yunge imbo talapemu paa konopu mondopalie kolo wangopa kolorumu aku teko mele enonga amboma konopu mondaio.

<sup>26</sup> Yunge imbo talapemu Gotenga talape kake telimu molopili nimbe Kraistini yunge kolo wangopa kolopa, yunge ungumu tuku panjipe noni yunge talapemu kulumie torumu.

<sup>27</sup> Aku tepalie kalaro te naa molopa lupe te naa molopa, aku ulu keri te naa pepa, kangi paa

kake telimu angilipe nani nanga imbo talape paa pengamu kanopo tuku liembo nimbe aku tepa terimu.

<sup>28-31</sup> Aku teko iyemani enonga kangima konopu mondokolio nokoromele mele enonga amboma konopu mondaio. Iye teni yunge ambomu konopu mondoromo akumu yu yunu konopu mondoromo mele. Imbo teni yunge kangimu kinye opa pule naa toromo. Kraistini yunge imbo talapemu nokopa kondoromo mele aku tepa imbo teni yunge kangimu nokopa kondoromo.

Lino Kraistinga kimbo ki mongo melema moromolona lino yunge imbo talapemu aku tepa nokopa kondoromo. Ungu tendeku mele Gotenga Bukuna i tepa nimbe peremo:

Goteni ambomu kinye iyemu talo terimumunga  
    iye teni anumu lapa talo tiye kolopa  
        yunge ambomu kinye pekolo elo kangi  
            tendekumu mele molonge. *(Stt 2:24)*

<sup>32</sup> Aku ungumunga ungu pulu enge te lopeke mele teremo. Nani pilto, Kraist kinye yunge imbo talapemu kinye aku talondo nimu konopu lteo.

<sup>33</sup> Nalo aku ungumunga tumbi tipe ungu pulu te enonga peremola. Eno iyema yu mele mele konopu mondoromele mele enonga amboma aku teko konopu mondaio. Eno ambomani enonga iyema ninge unguma pilko tengen tiko eno ulu pengama teaio.

## 6

*Bakuluma kinye anupili lapali kinye eno tengel uluma*

<sup>1</sup> Bakuluma, Goteni anupili lapalini eno nokangei nimo kani aminyeli lanielinga unguma pilko tengen tiko teaio. Aku ulu toya tolimu tengen.

<sup>2</sup> Goteni oi ungu mane tirimu bukuna moromo mele i tepe, aminyeli lanieli kinye teko kondoko enonga unguma pilko liko teaio nimu kanomu. Aku tepe nimbeline wali Goteni mi lepa ulu te tembo nimu. Aku ungumu i tepe,

<sup>3</sup> eno mai kombuna molopo kondopo, poinye awini molamili ningi aku tengen nimbe aku tepe olandopa nimbe panjirimu.

<sup>4</sup> Eno lapalini, enonga bakuluma teko mu-mindili naa kondaio. Eno Awilimunga unguma mane tiko teko wamoko nokoko kondaio.

*Kou mone naa liko kongono we tenderingi kendemande imboma kinye kongono nokoli iyema kinye enonga ungumu*

<sup>5</sup> Kongono we tendeli kendemande imboma, eno enonga kongono nokoli maina iyemani ninge ungumu pilko konopu tiko pipili kolko teaio. Eno konopu talo tepe pepili enonga kongono nokoli iyemanga kongono naa tendangei. Enoni Kraistinga ungumu pilko liko teremele mele aku teko kongono nokoli iyemanga unguma pilko liko teaio.

<sup>6</sup> Enonga kongono nokoli iyemani teaio nimele mele kanoko molangei tengen tipo temolo kinye kapi ninge ningi aku teko kau ningi pilkolio unguma tengen tiko naa teaio. Enoni Kraistinga kendemande imboma molopo yunge kongono tenderemolo ningi pilko aku teko mele enonga kongono nokoli iyemanga kongonoma

tendengeindo Gotenga kongonoma konopuni pilkolio kongonoma enge ningotonokoloteaio.

<sup>7</sup> Imbomanga kongono kau tenderemolo kani ulure molo ningokongono nokoli iyemanga kongonoma naa tendangei. Kongono nokoli iyemanga kongono kanomu Awilimunga kongono tenderemolo lepamo ningokaku teko kongono nokoli iye akumanga kongonoma konopu pengapepili toyatoko tendaio.

<sup>8</sup> Awilimuni kendemandekongonotenderemeleimboma kape enonga kongonoteremeleimboma kape pali teko kondonge melekanopalie melema timbelo ningopilkolio enonga kongono nokoli iyemanga kongonoma aku tekoenge nimbo teamili ningolikomanjeio.

<sup>9</sup> Kongono nokoli iyema, enoniaku teko kongonowe tendeli kendemandeimbomatekokoondangeikala. Mulu kombuna moromo iyemu yukendemandeimboma kinyenokoli iyema kinyeenonga pali Nokoli Iye Awilimu. Yuni imbomangaimbima kanopalie enonaamoke tembaloningo liko manjikolio enoni enonga kongonowe tendeli kendemandeimbomatekipili naakondaio.

*Kraistainga imboma opa tengindo kune tolomelema enge ningambolangeinimuungumu*

<sup>10</sup> Kinye ungu te kamukumu nembo, lino engenimbo molamili ningokawilimukinyekoputekomolkyunge enge awilitepapelimalinoliemilitipili ningomolaio.

<sup>11</sup> Kuromanga nomi Sataneni uluma kolotopa tepalino konditoromokani engenimbo

angilemili ningo eno Goteni opa teli melema tirimoma pali liko pakoko molaio.

<sup>12</sup> Wamongo liko manjeio. Linoni imboma kinye opa naa teremolo. Nalo melema nokongeindo enge peremo kuroma kinye, imbi molopa kombu lupe lupe nokoromele kuroma kinye, mulu mai naa pora nimo wali tumbulu tolina mai kombuna nokoromele kuroma kinye, muluna ola moromele kuroma kinye, akuma kinye opa tepo moromolo.

<sup>13</sup> Akumunga Goteni opa teli mele tirimoma pali liko pakoko ambolko molaio. Aku tengen kinye umbuni walima wendo ombalo kinye eno manda enge ningi angilko opa manda tengen. Kano kinye wali mare opa pulema welea naa toko mundunge lemo we nokoko angilengei.

<sup>14</sup> Akumunga lino naa topa mundupili, enge nimbo angilemili ningi ungu paimboma kako mele toko, ulu tumbi nilima kapani teli wale pakoli mele luwindo pakoko

<sup>15</sup> imboma Gote kinye manda molonge Gotenga ungu tukumemu ningi tilko andonge kimbo tu mele mondaio.

<sup>16</sup> Aku melema pakokolio, Gotenga ungu tukume paimbo ltemona Kraistini lino lipe tapondombalo ningi enge ningi ipuki tirimelemu enonga kune tapoi mele lepo teko molaio. Aku kune tapoimuni keri kuro Sataneni mera tipe nomba pelimani eno tombalo kinye tipemu manda topa ku mundumbelo.

<sup>17</sup> Goteni imboma ulu kerimanga wendo ltimu. Aku konopumu wainye kapani telimu mele liko pakaio. Mini Kake Telimunga opa teli bainet

liko ambolaio. Bainet akumu Gotenga ungu tukumemu.

<sup>18</sup> Minimuni eno enge timbelomuni waliwalima Gote kinye konge teao. Ulu lupe lupema wendo ombalo akumanga Gote kinye konge teao. Yuni yunge imboma lipe tapondopili ningotangoli kape ipuleli kape waliwalima kanoko koranaa molko Gote kinye wamongo konge teko malaio.

<sup>19</sup> Goteni na lipe tapondopili ningonanga nangoyu konge tendekolio, na imboma ungu nimbo tipo tembo kinye na imboma pipili naa kolopo Gotenga ungu tukumemunga ungu pulu lopeke tepa peremoma tumbi tipo nimbo para tiembo kani Goteni nanga kerena ombo molopa ungumu nimbe tipili konge tendao.

<sup>20</sup> Kano ungu tukumemu nando ningotipuwi nimbe Goteni lipe mundurumuna andoponimbo tiromunga na ka ulkena pero. Aku ungu tukumemu Awilimuni nando ningot tilko andowi nimbe kongono tirimu kani na imboma pipili naa kolopo nimbo tiembo ningot Gote kinye konge tendao.

*Poloni pipia topa pora timbeindo Goteni imboma mane tipili nimbe nimu ungumu*

<sup>21</sup> Ungu ninduma pora nimo. Na kongono tepo, ungu nimbo, konopuna pilipo moro mele iye Tikikusini eno moromelena ombo nimbe timbelo. Tikikus yu nanga konopu mondoro angenumu, Awilimunga kongonomu nimbe lipe tapondopa teremo iyemuni na moro mele nimbe timbelo.

**22** Eno konopu u nipili molangei nimbe lino moromolo mele eno nimbe tipili nimbo eno moromelena yu lipo munduro.

**23** Lapa Gote kinye Awili Jisasi Kraist taloni eno Kraistinga imboma konopu u nipili molko, nendo yando imboma konopu mondoko, enge ningi ipuki tiko molangei nengili.

**24** Imbo linonga Awili Jisasi Kraist konopu mon-doromele mele tiye naa kolko yu konopu mon-doko kau moromele imboma Goteni Kraist kinye konopu noirimo mele eno kinye konopu noipili. Aku peya nio.

**UNGU TUKUMEMU**  
**The New Testament in the Imbo Ungu Language of**  
**Papua New Guinea**  
**Nupela Testamen long tokples Imbo Ungu long Niugini**  
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 25 Aug 2024 from source files  
dated 31 Aug 2023

8e236e4f-bf7f-5fe1-a0ea-4f115d5cbf7e